

11 AUG 2000

Kart-Enduro

PELUMBA MUDA MALAYSIA DIJANGKA BERI SAINGAN

LANGKAWI, 11 Ogos (Bernama) -- Pelumba-pelumba muda Malaysia dijangka memberi saingan hebat pada Kejohanan Kart Indy 40 Enduro cabaran Langkawi 2000 merebut Piala Perdana Menteri Malaysia Sabtu ini.

Juara Asean Kart Prix Langkawi 2000 Mohd Fairuz Fauzy, 18, ialah antara pelumba muda yang akan membawa cabaran negara pada kejohanan itu di Litar Kart Morac Antarabangsa di sini.

Mohd Fairuz akan menggunakan segala pengalamannya ketika bertanding pada Formula Ford di England untuk bersaing dengan pelumba handal termasuk dari Jepun dan China.

Pasukan dari Malaysia, Young Guns yang menduduki tempat ketiga tahun lepas akan turut beraksi semula tahun ini.

Pasukan itu dianggotai pelumba belasan tahun terdiri Nik Irwan Nik Izani, Rohahijaz Mat Ropit, Victor Chong dan Aaron Lim.

Beberapa pelumba berpengalaman seperti bekas juara kebangsaan Kifli Othman dan Normat Jusat akan turut serta.

Perdana Menteri Datuk Seri Dr Mahathir Mohamad dijadual merasmikan perlumbaan yang mencabar dan tahan lasak tanpa henti itu sempena Hari Kebangsaan.

Kejohanan kali ini akan turut menyaksikan empat pelumba dari Formula Ford dari England beraksi.

Juara bertahan FCS dari Jepun akan turun sekali lagi untuk mempertahankan kejuaraan pada perlumbaan ini, Jepun juga menghantar lima pasukan untuk bertanding pada kejohanan itu.

Jurucakap penganjur berkata pasukan dari England, Itali, Jepun, Singapura dan China telah mengesahkan penyertaan.

Sementara itu Kejohanan Kart Prix Formula Rotax 125 akan turut diadakan sempena perlumbaan itu di sini.

Langkawi merupakan siri kedua dari empat sirkit yang dipertandingkan untuk pelumba-pelumba dalam negara sahaja.

Sebelum ini, perlumbaan siri pertama diadakan di Sepang pada 22-23 Julai, Langkawi 12-13 Ogos, Kota Baharu 2-3 Sept dan Sepang sekali lagi pada 14-15 Okt.

Kejohanan itu adalah untuk mencungkil bakat-bakat serta sebagai asas pemilihan pelumba mewakili Malaysia pada Kejohanan Dunia di Puerto Rico yang dijadual akhir tahun ini.

Perlumbaan dua hari itu dianjurkan Mofaz Motorsport Sdn Bhd, Lembaga Pembangunan Langkawi (LADA) dan Kelab Motorsport Langkawi penganjur bersama perlumbaan itu.

-- BERNAMA

ZI FAZ